

KHI THUNGETNA

1) Khikhin kipatna: AD 400 kiimpan kipan in Monks te in Salan 150 pen thungetna in hongnei uhhi. Tua hun in, laisim thei mi tam nailo hi. Tua ahih manin mipi (Christian mipi) te in tua Salan pen ngenthei lo ahihmanin, Salan 150 tangin, Vantung thungetna pen 150 vei hong ngen ciatciat uhhi.

Ahizongin tua 150 dong hongnget uhciang mangngilh pahpah loh nading ci in, suangtang kaikhawmin khatkhitkhat in 150 vei acin dong suangtang tawh hongciam teh uhhi. Tua pan in, suangtangtawh ciapteh pen vaitamlua, leh buaihuai lua hongsa ahih manin, Monks te mah in khau hongkhihbok tiltel in, 150 hong khihbok in tua pen Guikhat hongsuaksak hi. Hih pen Khihongpian khatna ii bulpi ahihi.

Kumzalom 12 (*12century*) hongtunciangin, St Dominic ma kaihna tawh Vantung thungetna bek hilo in, *Lk 1:28 na leh Lk 1: 42* na honggawm in Ave Maria thungetna hongsuak ahihi. Tua hun akipan in Vantung thungetna leh Ave Maria thungetna pen gawmin 150 vei mah hongngen uhhi. Ahi zongin Ave Maria thungetna pen tu a i neih bangin kicingnai lo hi. (Vantung thungetna khitciang, Ave Maria, ci-in khat khit teh khat, khat khitteh khat in hongngen hi)

Tua Ave Maria thungetna in: *Ave Maria aw, hehpihna tawh naki dim hi. Topa Pasian in nangtawh omkhawm a, numei khempeuhlak pan navanglian pen hi (Lk 1:28). Nasunga om naungekzong asiangtho pen Vanglian Pasian Tapa ahihi (Lk 1:42).* Kumzalom 14 (*14 century*) ciangin, Capuchin Monk ahi Henry in, Vantung thungetna khat vei ngetkhit simin, Ave Maria 10 vei ta ngetding in hongpuahpha to leuleu hi. Kumzalom 15 ciangin, Lungngaihding thuthuk nam 15 te Pawlpi in hongtangko khiata hi.

Kumzalom 16 ciangin, Ave Maria 10 vei ngetkhit sim in: *Pa, Tapa, Khasiangtho tungah minthan vangliatna omta hen....* cih ngetden dingin, Pawlpi in hongtangko leuleu hi. Tua tawh kizomto pah in: *Siangtho Maria, Pasian nu aw, tu a*

kipan, kasih hundongun, mawh na nei kote adingin, thuhong ngetsak tan, Amen. cih thungetna tomno Pawlpi in, hong behlap sak hi.

1917 kum in, Fatima khua ah, Francisca, Juscinta, leh Lucia te tungah Tonu kilah lai in avaihak thungetna ahi: *Topa Jesu aw, kote mawhna hongmaisak inla, meikuangpi tawh hongkipelhsak tan. Mikhempeuh vantung gamnuam hong tungsak inla, nonghehpihna akisam mite atuam mahmah in honghuhtan,* cih Tonu kammal ngiat pen Khikhinna ii anu nungah ngetden dingin Tonu hongvai khak mahbangin, hongki behlap to leuleu hi.

Hih atunga thu tengpen, banghangin khi kikhin hiam cih hinai lo in, Khikhinna hongpiankhiat na ii, tangthu bek ahihi.

2) Banghangin RC te in, Khikhin neise hiam?

RC te in khikhin nei hilo zaw in, Khikhin hongpiankhiatna tangthu i et ciangin, Christiante in, Khikhin anei ahizaw hi. AD 400 kiim in, tu huna Christian ka hihi aci, pawl tuamtuan te omnai lo a, Christian Pawlpi ahi, Catholic pawlpi bek na ompan hi. Tua ahih manin, RC te in Khikhin nei sese hilo in, Christian te in, Khikhin anei hi cileng manzaw ding hi.

Banghang Sanggam Christian te in Khikhin na sangthei lo hiam i cih ciangin, Tonu mahmah pen thupi salo uh ahih man ahihi. Tonu ii athupi't na atheihtheih matengun, Tonu tungah thungetna pen, thupi sangeilo mahding ahihi. Mi khat in thungetsak theiin, "Sia aw, thu hongngetsak in", ci thei hina pi in, Tonu tungah, "Nu aw, thu hongngetsak in," cihding pen sangtheilo in, "Jesu minsuang thungetding hi, Maria minsuang in thungetding LST in hongsawl lo hi," ci ciatciat bilbel uhhi. Ahi zongin, kua mahpeuhmah in Khikhin natawh, Maria min suangin thungen hilo in, "Nu aw, kote adingin thu hong ngetsak in," aci te i hihi.